

— Դուք չէք ճանաչում, թե ինչ տեսակ մարդ է Հայրիկը, պարոն, լսեցե՞ք, այդ տեսակ մարդից ո՞վ կը վախենայ, կամ ո՞վ բանի տեղ կը դնի: Երբ պատահում է նրան փաշայի դուռը գնալ, միշտ մենակ է գնում, առանց ծառաների, առանց սպասաւորների, եւ միշտ ոտով: Շատերը նրան չեն ճանաչում եւ փողոցներից անցնելու ժամանակ՝ ընդհարում են նրան: Փաշայի ծառաներից ոչ ոք նրա առջեւ ոտքի չէ կանգնում, իսկ փաշան խիստ սառն է ընդունում:

— Նրա համար, որ նա միշտ փաշայի կամքին հակառակ է գնում, — ընդմիջեց արհեստաւորը:

Փաշայի անունը անդադար յիշոելով, ես ստիպուեցայ հարցնել.

— Փաշան ի՞նչ տեսակ մարդ է:

Թաղական խորհրդի անդամը, որպէս աւելի պաշտօնական մարդ, պատասխանեց.

— Աստուած նրան երկար կեանք տայ, երբեք նրա նման լաւ փաշայ չենք ունեցել: Այն օրից, որ եկել է, գիտե՞ք, որքա՛ն մարդիկների կախել է տո՛ւել, որքանի՛ ձեռքը, կանջը, քիթը կտրել է տո՛ւել, որքանի՛ տունը տեղը այրել է տո՛ւել եւ ունեցածը գրաւել է: Թրի ծայրից արիւն է կաթում: Բոլորը սարսափում են, բոլորը դողում են նրանից:

Դարձեա՛լ սարսափ, դարձեա՛լ երկիւղ: Չարմանալի էակներ են մարդիկ, նրանք սիրում են տեսնել ուժ, մինչեւ անգամ կոպիտ, անգութ, բարբարոսական ուժ, որի առջեւ խոնարհուէին, որին պաշտէին: Ես հաւատացած եմ, որ թե՛ թաղական խորհրդի անդամի եւ թե՛ եկեղեցու երեցփոխանի հայեացքները բոլորովին անկեղծ էին: Նրանք այդպէս համոզուած էին, թէ այլ կերպ լինել կարող չէր, թէ մարդիկ պէտք է վախենան իրանց իշխանաւորից, որ նրան հնազանդոին, լինէր նա մի հոգեւոր առաջնորդ կամ մի երկրի կառավարիչ: Մինչեւ անգամ աշխատողի արհեստաւորը, որ մի շատ համակրական մարդ էր երեւում, լռեց, ոչինչ չպատասխանեց թաղական խորհրդի անդամի վերջին խօսքերին: Չգիտեմ, գուցէ նա զգուշացաւ փաշայի դեմ որեւիցէ աննպաստ կարծիք յայտնել: Այստամենայնիւ, ես աւելի հաւատացի, որ նրանք խորին համոզմունքից էին խօսում, երբ հարցրի.

— Փաշան մարդկանց խեղդել է տալիս, փաշան մարդկանց տները այրել է տալիս եւ ունեցածը յափշտակում է, — դրա համար էլ լաւ՝ փաշայ է:

— Ի՞նչ ասել կուզէ, — պատասխանեց այժմ երեցփոխանը: — Եթէ այդպէս չանէ, նրանից ո՞վ կը վախենայ, ամենքը գազան կը դառնան եւ միմեանց միսը կուտեն: